



TEKS UCAPAN ALUAN
YB MENTERI PERTANIAN DAN INDUSTRI MAKANAN

PROGRAM YAB PERDANA MENTERI BERSAMA
PELADANG, PENTERNAK DAN NELAYAN SABAH SERTA

PELANCARAN SKIM SUBSIDI BAJA DAN RACUN PADI
BUKIT/HUMA DI BEAUFORT, SABAH

17 SEPTEMBER 2020

Terima Kasih Saudara / Saudari Pengacara Majlis.

SALUTASI

Yang Amat Berhormat Tan Sri Dato' Haji Muhyiddin bin Haji Mohd Yassin,
Perdana Menteri Malaysia.

Yang Berhormat Datuk Seri Haji Ahmad bin Hamzah,
Timbalan Menteri Pertanian dan Industri Makanan I.

Yang Berhormat Dato' Haji Che Abdullah bin Mat Nawi,
Timbalan Menteri Pertanian dan Industri Makanan II.

YBhg. Tan Sri-Tan Sri, Dato'-Dato', Datin-Datin, Tuan-Tuan, Puan-Puan.

Para Peladang, Penternak dan Nelayan yang saya sanjungi.
Seterusnya Saudara dan Saudari yang saya kasihi sekalian.

Selamat Pagi dan Selamat Sejahtera saya ucapkan.

PENDAHULUAN

1. Pertama sekali, saya ingin **merakamkan setinggi-tinggi ucapan terima kasih kepada Yang Amat Berhormat Perdana Menteri** kerana di sebalik jadual beliau yang padat, dengan kesibukan pelbagai tugas-tugas rasmi, beliau tetap juga meluangkan masa untuk bersama-sama menyantuni golongan peladang, penternak, dan nelayan di Negeri Sabah. Bagi saya, ini adalah satu **bukti keprihatinan Yang Amat Berhormat** kepada kebajikan saudara dan saudari yang merupakan barisan hadapan jaminan bekalan makanan negara.

NASIB PELADANG, PENTERNAK DAN NELAYAN SENTIASA DIBELA

Saudara dan Saudari sekalian,

2. Saya ingin memaklumkan hadirin tentang peranan dan fungsi Kementerian Pertanian dan Industri Makanan (MAFI) Malaysia. Terdapat 13 Jabatan dan Agensi di bawah MAFI Malaysia. **Lima (5)** daripada 13 Jabatan dan Agensi Kementerian ini beroperasi di Sabah khususnya dalam pembangunan peladang, penternakan, perikanan, penyelidikan, perbankan dan industri makanan iaitu **Lembaga Pertubuhan Peladang (LPP), Lembaga Pemasaran Pertanian**

Persekutuan (FAMA), Lembaga Kemajuan Ikan Malaysia (LKIM), Institut Penyelidikan dan Kemajuan Pertanian Malaysia (MARDI) dan Agrobank. Kementerian pada setiap masa memainkan peranan penting untuk memastikan bekalan makanan utama negara seperti beras, buah-buahan, sayur-sayuran, ikan dan daging terjamin semasa pandemik COVID-19.

3. Disebabkan oleh pandemik COVID-19 yang melanda, **Kerajaan** di bawah pimpinan **Yang Amat Berhormat Perdana Menteri** telah **mengambil tindakan pantas dengan melancarkan pakej rangsangan ekonomi PRE, PRIHATIN dan PENJANA** bagi memastikan sektor-sektor yang terkesan dan rakyat keseluruhannya mendapat sokongan dan bantuan yang diperlukan. Antara inisiatif dan program yang telah dirangka adalah dengan memantapkan rantai bekalan makanan seperti menambahbaik infrastruktur, mengukuhkan pusat pengumpulan, pemprosesan dan pengedaran serta meluaskan lagi pemasaran. MAFI Malaysia sahaja telah diperuntukkan **RM650 juta** dibawah pakej-pakej rangsangan ekonomi ini di mana lebih daripada **RM73 juta** telah diperuntukkan ke Negeri Sabah sahaja.

4. Sebagai contoh, daripada jumlah **RM50 juta** **Dana Khas Pertubuhan Peladang Kawasan** yang telah diumumkan oleh **Yang Amat Berhormat Perdana Menteri**, sebanyak **RM4.74 juta** atau **9.5%** disalurkan kepada Negeri Sabah, antara yang tertinggi berbanding negeri-negeri lain. **Terima kasih kita ucapkan kepada Yang Amat Berhormat Perdana Menteri** yang sentiasa mengambil berat dan prihatin kepada nasib peladang, penternak dan nelayan.

PERUNTUKAN DAN PERANAN SABAH DALAM SEKTOR PERTANIAN DAN INDUSTRI MAKANAN

Saudara dan Saudari sekalian,

5. Bagi memastikan taraf sosio-ekonomi peladang, penternak dan nelayan terus maju dan tidak terkebelakang berbanding sektor lain, bagi tahun 2020 sahaja, MAFI Malaysia telah memperuntukkan lebih daripada **RM70 juta** untuk negeri Sabah bagi **membina dan menaiktaraf infrastruktur pengairan dan saliran, membangunkan projek tanaman, perikanan, ternakan dan tenusu** serta **bantuan-bantuan berbentuk input, teknologi dan insentif galakan skim pertanian baik.**

6. Sabah merupakan **negeri yang kedua terbesar di Malaysia. 27% daripada guna tanah Sabah** adalah bagi **tujuan pertanian**, iaitu kira-kira **1.98 juta hektar**. Keluasan tanah pertanian Sabah adalah jauh lebih luas walaupun jika dibandingkan dengan keluasan seluruh negeri tertentu di Semenanjung Malaysia.

7. Dengan memiliki tanah pertanian seluas ini, tentulah **Sabah mempunyai potensi yang sangat besar dalam sektor pertanian dan industri makanan. Sumbangan sektor pertanian Sabah kepada KDNK pertanian negara pada 2019 adalah bernilai RM13.7 bilion atau sebanyak 13.5%. Sabah turut mempunyai potensi bagi membangunkan produk-produk pertanian seperti padi, nanas, durian disebabkan oleh kesuburan dan keluasan tanahnya** serta

hasil perikanan seperti rumpai laut yang boleh menyumbang kepada eksport negara.

Saudara dan Saudari sekalian,

8. Dengan pelbagai bantuan khas yang disampaikan oleh Kerajaan, saya berharap ianya dapat dimanfaatkan sebaik-baiknya oleh para peladang, penternak, nelayan dalam meneruskan aktiviti pertanian masing-masing. Kerajaan Perikatan Nasional akan terus memastikan **kebajikan dan kemakmuran saudara dan saudari menjadi keutamaan pada setiap masa serta akan memajukan lagi sektor pertanian dan industri makanan negara termasuk di Negeri Sabah.**

PENUTUP

9. Saya sedar yang saudara dan saudari semua sudah tidak sabar untuk mendengar ucapan daripada Yang Amat Berhormat Perdana Menteri. Jadi saya tidak berhasrat untuk berucap dengan lebih lama lagi. Tetapi sebelum saya mengundurkan diri, saya ingin menyeru saudara dan saudari supaya sentiasa mengambil langkah berjaga-jaga dalam melindungi diri dan keluarga daripada ancaman virus COVID-19. **Saudara dan saudarilah wira negara dan barisan hadapan yang akan memastikan bekalan makanan negara kita sentiasa cukup untuk terhidang di atas meja 32 juta rakyat Malaysia.**

Sekian, terima kasih.

